

五松園文稿







稿文園松五

撰衍星孫

編主五雲王

編初成集書叢

稿文園松五

中華民國二十五年十二月初版

撰者 孫星衍

發行人 王雲五  
上海河南路

印刷所 商務印書館  
上海河南路

發行所 商務印書館  
上海及各埠

群

第

# 五松園文稿卷一

清 孫星衍撰

## 亥有二首六身解

春秋左傳襄三十年晉絳縣人曰。臣生之歲。正月甲子朔。四百有四十五甲子矣。其季於今。三之一也。史趙曰。亥有二首六身。下二如身。是其日數也。士文伯曰。然則二萬六千六百有六旬也。按史趙言亥有二首者。十干配十二支。從甲寅數至亥。則餘甲子乙丑。子與丑實支之首。故云二首。六甲爲身。故云六身。下甲子乙丑。與甲寅甲辰甲午甲申甲戌同計之。方成六甲。故云下二如身。是其日數。言不外二與六也。二萬大數在先。故曰首。六千六百六旬餘數在下。故曰身。史趙舉二六之數以明之。大數在前。餘數在後。士文伯卽知是二萬六千六百有六旬。史趙舉亥以示之。支有十二而干十。士文伯卽知以旬計矣。今杜預注以文字形言之。豕字古文。竝非二首六身也。且亥字不以干支求之。所云二首六身。安知非二萬六千六百有六日。而云旬乎。吾友李文學銳推之云。二萬六千六百六十日。以甲子六十除之。得四百四十四甲子。又六十分之二。卽三之一也。四百四十四外。又得二十日。故曰四百四十五甲子也。其第四百四十五甲子。才有二十日。故曰其季於今三之一也。

## 祥禫不同月辨

今世三年喪。依鄭氏二十七月而除。甚合經義。惟江南習俗。大祥後稱禫。旣無受服。又廢禫祭。失禮之甚。

者其謬始於王肅而成於宋儒不可不辨。王肅與鄭爲難。謂祥禫同月。解士虞禮中月而禫爲月中。不知鄭氏本西漢諸儒古義。按檀弓正義引戴德喪服變除禮云。二十五月而大祥。二十七月而禫。白虎通亦云。二十七月而禫。然則鄭氏解中月云。與大祥閒一月。自喪至中凡二十七月。非臆說矣。雜記期之喪。十三月而祥。十五日而禫。爲父在爲母及妻長子也。期喪祥禫尙不共月。豈三年喪反共月乎。禫字從示。說文云。除服祭也。鄭氏注士虞禮云。禫祭名也。開元禮。祥禫祭不同月。通典議以二十六日終而禫。二十七月終而吉。若從王肅祥禫同月。則禫祭何所施。施於二十五日。則奪祥祭。施於終禫。則奪吉祭。是何禮乎。沈約宋書禮志。永初元年。黃門侍郎王準之議云。晉初用王肅議。祥禫共月。遂以爲制。江左以來。惟晉朝施用。搢紳之士。猶多遵鄭議。宜使朝野一禮。詔可。是列代俱知王肅之非也。孟獻子禫。縣而不樂。比御不入。孔子曰。加人一等。明禫即可聽樂入內。與大祥禮殊異。祥禫共月。雖用二十七月古禮之文。仍從二十五月短喪之實矣。宋時朝禮亦略如唐時。其誤由於司馬氏作書儀云。大祥出就次。易禫服。注云。世俗無受服。謂大祥爲除服。卽著禫服。今從衆。讀禮通攷引書儀注云。所謂中月者。蓋禫祭在祥月之中也。歷代多從鄭說。今律勅三年之喪皆二十七月。不可違也。與今本殊。紫陽朱氏曰。二十五月祥後卽禫。當如王肅。於是月禫徒月樂之說爲順。今從鄭氏之說。雖禮宜從厚。然未可爲當。据此是宋儒私議。違鄭從王。當時朝制且不行之。大祥後自有變除之服。見於經典。宋儒攷古甚疏。不及知耳。閒傳云。禫而織。無所不佩。又云。素縞麻衣。玉藻云。縞冠素紕。檀弓正義引戴氏喪服變除云。白屨無絢。經證甚明。何爲無受服。是則不可謂大祥爲除服。亦斷不可從衆。宋儒以肅議違經。又以私

禮違朝制。實不知禮之甚者矣。古者布用麻。有疏密之別。故鄭注素縞麻衣云。十五升布。言漸密於衰麻也。今世有布木縣。若依古禮。推禫服。當以二十六月設禫祭。以素布衣履。易麻衣冠。加黑緯。以白屨。無緣。易舄履。終月後吉祭而除服。庶幾合於經義。又不違國家二十七月終喪之制。學者盍因吾言。研覈是非焉。

### 葬說

今世士大夫。惑於陰陽禍福之說。尤莫如葬。其貧者久不卜窆。有力者屢遷其棺。妄冀祈福。蔭芘子孫。人心風俗之所繫。故備論之。以祛其惑焉。宮宅地形書。出於班固藝文志。其言地形。猶管子言山之見榮。非葬也。志又有堪輿金匱十五卷。顏師古引許叔重云。堪。天道。輿。地道。亦不謂葬。葬書不出於古。則非先王之法言矣。後漢書袁安傳。始載安父訪求葬地。今所傳郭璞葬經者。隨志及璞傳無之。宅經引子夏墓。凶宅吉之言。梁劉孝標注世說。引青烏子相冢書。大率後人依托。今不存。古人重廟不重葬。葬欲其藏之深。飾終欲其儉。卜地於北郊就陰。此其義也。禮云。生者南鄉。死者北首。是知葬必南向。向南則首北也。又云。研葬不卜宅。是知葬應耐祖。有地卽有穴。但以昭穆爲次。而不擇穴也。又云。死徙無出鄉。是知葬必于國都鄉邑。不能遠求吉地也。此皆經典可以依據。今則反之。信術家無稽之論。一則造爲子午向不可用之說。云當兼天干。甚則或東或西。四維八干。皆任其意。不察古人營宅墓。皆守北首南向之義。無貴賤皆用子午。法天道。和陰陽也。傳曰。水昏正而栽室。壁四宿在亥。至子月正位。午方。又曰。南門正。南門在巳。至午

月亦正位午方。觀經典所命星名爲作室取法。虛宿在北宮。虛從丘亦爲哭泣之事。丘从北一。故狐死首丘。是爲葬首北取法。呂氏春秋云。周鼎著鼠。令馬履之。爲其不陽也。鼠子馬午。卽見古者宅墓向明之義。余因訪求碑碣。細審唐宋以前冢墓。無不用子午者。明時有閩人鄭善夫移馬陵西向方志以爲不足據今時官廡及元明摺紳宅院。亦皆正南向。故古者官有世祿。其福蔭轉勝於今。所以然者。陰陽交於子午。子月冬至。陰極陽生。午月夏至。陽極陰生。天道循環。非子午則爲絕陰絕陽。淮南子及孝經緯云。斗指壬小雪。指子冬至。指癸小寒。指丙芒種。指午夏至。指丁小暑。今用壬丙癸丁代子午。皆寒暑陰陽不能相生之節。用之冀宅墓縣長獲福。是背天道而馳也。子午不可用之說。出自何書。問之術士。亦不能言其根據。或云。西人爲此言。移其國位在午。尤可惡也。且生則悅陽。死則悅陰。物之情也。死者首北。所以安魂魄。病者東首。受生氣也。今舉死者首東首南。反其道矣。何以獲福。此術者之惑也。一則誤用前朱雀後元武左青龍右白虎之說。東方木色青。故曰青龍。西方金色白。故曰白虎。朱雀元武之名。亦依方色而立。今不論東西南北。徒以左右前後名之。若北向則木爲白虎。金爲青龍。名不正則言不順。且與天象違異。尤顯然者。察其致誤之由。因讀禮記云。前朱雀而後元武。左青龍而右白虎。不知四者行軍之旗幟。故可左可右。下云招搖在上。亦謂畫北斗於幡也。且爲上有行字言之。行法天動。止法地靜。命之曰行。知止則反是。今地道靜而不移。奈何以軍行視之。不善讀書。違背天道甚矣。復有信先天卦位之說。移易方位。謂後天之坎離。卽先天之乾坤者。先天卦位。出於陳搏僞造。近世諸儒駁之無遺義。更不可信。八卦列於八方。按十二月。此孔子之言。若乾南



坤北則坎離艮震巽不當盡列於東方乎。錯亂五行。又術者之惑也。一則造爲無氣無穴之說。古者公墓之地。掌於冢人。國民族葬。掌於墓大夫。皆有其族。有私地域。豈能遽擇吉地。太公五世反葬。晉臣葬於九原。依國族也。世俗徒見孔子歷世封公。卽謂曲阜非孔子不能葬。非子夏不能葬。孔子於此。試問孔子魯人也。若齊若晉。有聖人葬地。能卜葬於他國乎。他國有聖如孔子者。能來葬於曲阜乎。且唐宋以來。孔子之後。皆昭穆祔葬。而傳爵不絕。所祔之穴。皆有氣乎。今世家所擇。有氣有穴。不遠數百里而葬之地。一再傳。而名位歇絕。又何故。此又術者之惑也。一則造爲三元甲子有衰旺近時宜用乾兌向之說。夫三元生於甲子。則年月日時皆有三元。一日一時。亦有旺氣。何獨取之於年。坎離天地正位。古今不易。六韜言。凡攻城圍邑。城之氣出而北。城可克。城之氣出而西。城可降。城之氣出而南。城不可拔。城之氣出而東。城不可攻。是古者依天道立向。貴陽賤陰之驗。若依三元旺氣。宮殿官署。數十年一易向。有是理乎。列代官署南向。縱居之者吉凶不定。而官署自存自旺。未嘗有退氣之時也。卽以人事卜之。今有葬地兌向。坐空朝滿。合術士法者。吾見已敗矣。此又術者之惑也。窆窆之事。欲其高燥安煖。則子孫心安。地道難知。陵遷谷變。古者但卜之而已。土中夏清。勝於停棺經暑。有速朽之患。仁人孝子念之。是以速葬爲急。古者限以踰月之制。大夫以上。不能倉卒備禮。又有賻贈會葬之文。不得已而至三月五月。非以緩葬爲貴也。今世人不明此義。直以吉凶係於宅墓。夫宅墓人命吉凶。皆以干支而定。葬可轉移禍福。將并所受干支。而更換之乎。卽云葬吉始得賢子孫。彼術者何不自謀而爲人役乎。乾爲積善。坤爲積惡。故孔子言積善餘慶。積

不善餘殃。作善不獲報。未能積也。今不積善。而欲求福於宅墓。即得吉地。保無水火盜賊之患乎。蘇化熊而入羽淵。王季葬於渦山。而水嚙其墓。至子孫且勃興。積德累仁所致。非葬之善也。近世術士。無通曉古書之人。不肖者。或預置符應於穴中。私約地主。取重值。必詭言人家祖墓不吉。乃可售己地。又詭言子午向不可用。或兼天干。或用四維。始可令葬者聽其指畫。其初由於欺人。其後有著之於書者。并以自欺。東南士大夫。久厝不葬。傾竭家貲之患。實由此輩。古者未葬不除喪。今國家亦有停棺不葬之律。安得以禮經責之。功令禁之。俾復三月踰月之制。又密訪所稱地師者。治以詐欺取財之律。則澤及枯骨之陰德遠矣。

孫忠愍侯祠堂藏書記

家大人少孤貧。好聚書。書賈幅湊。易衣物購之。積數櫃。旋以餓驅北行。予生四五齡時。既就傅。歸竊視櫃中書。心好之。年逾志學。從家大人之句曲官舍。因按日讀所列學宮十三經注疏及諸史。朱墨點勘。凡數過。幾廢科舉之業。已而負笈遊學院。江、淮海、河洛之閒。踰二嶠而西。著述於關中。節署。畢督部藏書甲海內。資給予。使得竟其學。嘗應試入都。備書四庫館。所見書益宏多。又數年。釋褐入玉堂。奉勅進西苑校中祕書。竝觀翰林院所存永樂大典。回翔省闈者九年。所交士大夫。皆當代好學名儒。海內奇文祕籍。或鈔或購。盡在予處。閒覽釋道兩藏。有最先古本。足證儒書及陰陽術數家言。取其不詭於經者。寫存書目。及官東魯。由監司權廉使。往來曹南。歷下。防河折獄。所頓亭傳。不廢披覽。旋以母憂南旋。倉皇相載。卷帙狼

籍時值河溢。經南陽湖。遇風沈舟。歸至金陵。料簡殘冊。置忠愍侯祠屋中。損書大半。比年負米吳越。貧不自存。猶時時購補數十種書。稍完具如初。或有創獲。蓋藏書之難。而好書之不能免於厄者。尙如是。所藏既不備。羣書不能區分四部。獨釋其最要者。以教課宗族子弟。略具各家之學。導來者先路。俾循序誦習。咸有法程。分部十二。以應歲周之數。曰經學第一。先以古義。附以雜說。漢魏人說經出於七十子。謂之師傳。亦曰家法。唐人疏義。守之不失。以及近代。仿王氏應麟輯錄古注。皆遺經佚說之僅存者。學有淵原。謂之古義。至宋。明近代說經之書。各參臆見。不合訓詁。多其游辭。少有要實。或又疑經。非議周漢。先儒謂之雜說。列於附存。曰小學第二。先以字書。次及韻書。訓詁之學不明。則說經不能通貫。或且望文生義。文字之變。隸楷遞改。滋生日多。既集漢魏字書。亦及後世。以盡其變。聲音反切。雖起六朝。或推本讀若舊音。而作且引古字書。亦宜兼載。曰諸子第三。先以古書。附以僞本。九流七略。互有改移。班書隋志。部分最當。依此爲類。庶非臆見。六韜舊入於儒。管子還列於道。周秦述作之才。幾於聖哲。或多古韻古字。僞書後出了。然可知。唐宋諸子。尤多游戲之作。附存於末。不惑後人。曰天文第四。先以垂象。次以算學。次以陰陽。黃帝巫咸。甘石之學。是分天部分野。以占吉凶。出於保章。左史其書最古。謂之垂象。九章。五曹之書。惟知轉算。不必長於觀象。謂之算法。遞甲六壬。其術亦古。不可中廢。合以命書算法。謂之陰陽。三者俱屬天文。其學各有所受。不能合一。曰地理第五。先以統志。次以分志。或總紀區宇。或各志封域。禹貢古文說及周地圖之言。存於列代地志。及水經注。括地志諸書。宋元方志。多引古說。證經注史。得所依據。宜存舊書。地名更

易。今古殊目。兼載今志。以資博考。曰醫律第六。先以醫學。次以律學。醫律二學。代有傳書。竝設博士。生人殺人。所關甚重。經稱十全爲上。醫不三世。不服其藥。史稱郭鎮。陳龍世傳法律。此學古書未火於秦。歷代流傳。尤不可絕。醫則刪其後出偏見者。律則今代損益盡善。欲求根據。兼載古時令甲云。曰史學第七。先以正史。次以雜史。次以政書。古今成敗得失。一張一弛。施之於政。賴有典型。存乎正史。史臣爲國曲諱。或有抵牾。尤賴雜史。以廣異聞。朝章國典。著作淵藪。舉而措之。若指諸掌。則政書尤要云。曰金石第八。金石之學。始自宋代。其書日增。遂成一家之學。鐘鼎碑刻。近代出土彌多。足攷山川。有裨史事。古今兼列。無所刪除。曰類書第九。先以事類。次以譜類。次以書目。古書亡佚。獨賴唐宋人編類。採存十五。非獨摭祭詞章。實則羽儀經史。謂之事類。譜學之傳。自東晉板蕩。南宋播遷。周秦世系。不可復尋。或多僞託。唐宋學有專家。傳書幸在。列代經籍。自有淵原。證以書目所存。僞本不能妄託。是亦事類之屬。故并爲一。曰詞賦第十。先以總集。次以別集。漢魏六朝。唐人之文。足資考古。多有舊章。美惡兼存。自宋以下。人自爲集。取其優者。入於書目。餘則略之。曰書畫第十一。先以總譜。次以分譜。六朝以來。以行楷爭奇。存乎絹素。或摹繪山川。故事以傳往迹。書畫小技。不絕於今。宜考其真贋。鑑賞之學。所謂賢於博奕。游藝及之。勿致廢事。曰小說第十二。稗官野史。其傳有自。宋以前所載。皆有本末。或寓難言之隱。或注所出之書。今則矯誣鬼神。憑虛臆造。竝失虞初志怪之意。擇而取之。餘同自飾焉。昔之聚書者。或贈知音。或遭火患。或以破家散失。或爲子孫售賣。高明所在。鬼神瞰之。予故置之家祠。不爲己有。既經沈湮。僅有文字可尋。卷帙零亂。知免天災。

豪華之咎。但捨之作官。不能多搆。是所歎望。略述原流。以曉後人云耳。

古佛像記

曩得古石佛像于關中。爲齊天保時所刻。又得于兗州。爲唐先天時所刻。又得宋刻畫象于終南山便子谷。又得烏斯藏古銅象。則楊方伯授所贈也。以是前代物。故愛玩之。置于家。先母好善。又守婦人無外事之義。聞釋氏不害于物。乃敬事之。日誦經禮拜。及遭疾。敬之愈至。疾益劇不起。吾仲弟哀吾母之事佛無効也。則毀其象。予止之曰。禮父母所愛亦愛之。又曰。思其嗜好。禍福定于天。佛不能爲福。卽不能爲禍也。世之持誦釋氏書者。徒以心有所歸。輕功名。減嗜欲。如吾儒之讀書稽古。不使外物役心耳。佛固不知佛之道。卽孟子所云仁心仁聞。不行先王之政。不可法于後世之道。亦異于殘殺者。而何必毀之。且夫秦之權。銅雀之瓦。蚩尤盜跖之冢。後人愛之。飾爲古迹。爲其難得也。火浣之布。非可禦寒。夜光之珠。不及廷燎。直以爲賞心之具。今置古佛像于堂室。比之法書名畫。所謂小道可觀矣。何必毀之。仲弟曰。吾聞父報讎。則子行劫。存此象以惑子孫。將有佞佛而入于邪。或耽虛無而廢事者。奈何。吾見世之愛士購書者。其後且有達人。世之悖出者。其後且悖出。世之逞才藏爲詞曲小說者。其後且入于流蕩淫僻。氣之所感。如流湮就燥。甚可畏也。遠則楚王英最先事佛。而不終其身。近則秦觀以寫佛書削秩。鄭鄭以符錄降仙作書。爲溫體仁附致其罪。人陽也。而接于陰。鬼氣中之家。爲不寧。性爲不正。招禍之道矣。是以惡其流弊也。予無以折之。亦不忍弃故物焉。遂記其事。以訓于家。

孫氏先塋連理木記

嘉慶四年太歲己未仲春月晦。星衍歸自金陵。展墓鄉郡。至毘陵西郊夾港口。謁十一世祖明贈漢中府知府諱錫公墓。披荆周覽。得異木焉。生當神道。團團如蓋。兩樹竝立。上枝連理。急告族人曰。此圖籍所稱木連理也。時始異之。野人聚觀。以爲嘉瑞。府君者。明故行山西太僕卿諱鑾之父。禮部尙書文介公諱慎行之曾祖也。或曰。府君之後。對策及第者二人。入詞館者四人。成進士任庶司者代有數人。皆清白報國。無田宅贖子孫。然歷兩朝。未嘗有擢國法謚名節者。聚族同居。且十數世。是木也。生其孫氏睦族餘慶之徵與。星衍曰。不然。此國瑞也。聞諸沈約志言。王者德澤純洽。八方合爲一。則木連理生。終軍對奇木言。衆枝內附。示無外也。國家重熙累洽。拓地數萬里。山陬海澨。必有神木生之。吾不及知。其在孫氏先塋。是吾族食德服膺。世受國恩。行葦勿傷之化所沾被也。且五行亥卯未木也。是木久拱矣。而顯在未歲月建卯也。於文未象木。重枝葉。位在西南。其應西南陲之民有慕化歸誠者焉。儒者不妄言符瑞。而洪範推天人休咎。嘉禾來牟。見於書。詩。不可諛也。星衍職任舊史。事應經典。敢不紀述。以示後世。且使子孫世世報國恩。而思先澤。庶幾毋翦斯木云。

許叔重本主結銜議

撫浙使者阮芸臺先生。既設話經精舍。以教生徒。星衍請崇祀先師許叔重。鄭康成於堂中。與臧文學。龔堂舍生洪茂才。頤煊。震煊。議所以書木主銜者。臧君以謂許君之子冲。上書稱太尉。南閣祭酒。比范史稱

洩長爲得其實。范史不載。明已疏也。洩長官卑。不宜以此。蓋太尉祭酒。星衍以謂太尉官屬雖貴。由其自辟除。不及洩長之列朝籍。鄭康成注禮。稱邑宰爲賢臣。洩長宜書。兼列太尉祭酒。如今人之書前官可也。且許沖上書。祇言其父病。未必病篤不起。或後爲洩長。范史則據終後而言。較可從。洪兩生以謂百官志。太尉官屬有黃閣。句主簿錄省衆事。其官以令史爲之。令史舊注百石。不及令長之秩。多至千石。最小亦三百石。是洩長尊於太尉官屬。周澤傳。建武末。辟大司馬府。署議曹祭酒。數月。徵試博士。中元元年。遷。隰池令。令長一也。許君由孝廉。辟太尉南閣祭酒。由祭酒遷洩長。故本傳云。再遷。除洩長。與周澤傳官階正符合。胡廣祭酒皆一位之元長。不必定屬尊官。今主題洩長。不及太尉祭酒可也。先生曰。洪兩生議是可兼題之。如孫君議。

### 與秦觀察瀛書

竊見閣下爲政之意。欲異乎俗吏之爲也。今監司奉命有專達之責。顧一方之弊政重且大者。非一人一時所能更。不能更而言之。以招執政者之忌。卒無益於事。僕官山左。屢以曹單河工。應有量隄格隄。請於當道。額之。託言無經費而不行。此其葬事矣。浙之士夫。不冝速葬。閣下所應酌限陳奏。以革其俗也。浙之多權厝也。積棺湖干。反以速葬者爲忍其親。其厝之而子孫有發迹者。愈以爲得地而不葬。或子孫之貧而絕者。又不能葬。是始終不葬其親也。聞且棄棺於道。斲爲船板矣。或曰。宋時南渡士夫。攢厝其親棺。以待北歸。今居於此者。何爲倪其習哉。此非示諭勸誨之所可禁也。又不可持之太急。以苦貧民也。按古有

未葬不除喪之禮。今三月隸月之制。縱不能行。閣下陳請。有終喪不葬其親者。官員不準起官。士子不準應試。商賈平民不準離鄉貿易。三年之久。富者既葬可依期。貧者亦無難舉事。其已終喪而未葬。事在令前者。再請限以一年。則部議不至以不便民相格。因浙省以推及於天下。此政一行。所謂澤及枯骨也。今之言事者。勦言擇其重者大者陳之。乃有濟耳。此近名也。夫重且大者。既不易更。可更者。又以爲不足言。是終無益於事也。人之身有苛疥焉。有痼疾焉。以苛疥求治於醫。醫者曰。吾欲得痼疾而治之。豈情也哉。或曰。浙中權厝者多。火生枯木。其應多火災。或曰。積屍之氣。經暑中人。則爲疫。丙吉見喘牛而問之。此亦調變陰陽之一端。廉車所宜問也。

## 貞節堂敘

吳之楓橋西岸有貞節堂。前開學翁鴻臚爲旌表節孝故奉直大夫袁君室韓孺人所署名也。堂外闌闌而內爽塏。芴則引泉種樹。左爲竹柏樓。後爲五硯樓。皆節母獨居課子。及子又愷藏書讀書之地。堂三開。不崇不隘。無磨礪雕績之巧。不佞與又愷相識晚。恨不及升堂拜母也。又愷涕泣言。母廿五而守節撫孤。越十五年而歿。方四十時爲乾隆之四十六年。子婦等用時俗禮爲母以生日舉壽觴。母舉古稱未亡人義。卻勿御。未幾母竟卒。又愷痛母益甚。徧乞當世賢士夫爲文以顯母節行。彙一帙。命曰霜哺遺音。不佞時亦有母喪。聞其言。不自知其淚潄潄不止也。孝經稱揚名於後世。以顯父母。不謂今之名位。世之以科名官位達者。不過奉告身。張燕會以爲親歡。誇耀閭里。愚婦孺甚則忘身。以及其親。數典而忘其祖。若是



者一郡邑率有數人。其身榮其後無聞焉。今節母卻壽觴不飲自顯。卒得旌於朝。又憤不汲汲求仕進。以立身能文章名於世。又推其孝思。以及其祖。藏葬先世書硯之屬。以爲宗器。使天下之士皆欲登其堂。觀其先澤。爲文以顯母之節行。若是賢子孫。海內千不得一焉。誠有合於孝經所云立身行道者。宜不以綠野畫錦之堂之易斯堂也。

### 湖北金石詩序

吾友嚴子進。搜攷湖北金石。自隋至元。凡若干種。爲之題詠。登臨之勝。興廢之感。讀之使人不勝情。夫詩固異於跋尾。子進此作。流連風景。抒寫性靈。可謂得風人之旨者矣。始舉督部鎮楚方。檄訪各路金石拓本。一上內廷三通館。一以副本爲之致證。如歐、趙所撰書。任其事者。子進與馬通守紹基也。子進既以此詩上督部。契賞其清雅。屬爲開雕。以備一方文獻。既而督部奄逝。楚中多故。金石書卒以不成。此邦金鐘鐵鐘。豐碑古碣。獨賴子進詩以傳一二。亦可慨已。予始與子進尊甫侍讀君。及張舍人塤。錢刺史沾。依畢中丞於關中節署。訪求古刻。中丞手著關中金石記。刊行於世。其後移節中州。又成金石書。如在關中時。子進亦省謁尊甫。作入洛之遊。一時翹材之館。風流文物。甲於海內。已而予官京師。侍讀捐館舍。諸同人亦多星散。中丞往來節制齊楚。不獨舊遊不可復預。著述之事。亦漸零落。及子進來東。訪予於濟上。巡使署。越十餘年。懷人傷逝。益不勝慨焉。然阮侍郎既刻山左金石書。以成督部之志。子進能讀父書。又以此詩存楚遊訪古梗概。督部生平好古愛士之心。亦可大慰於九京矣。子進所著有江寧金石記。又爲予校

輯寰宇訪碑錄將出而問世。此特其隄詠之工。不媿古所云登高能賦。遇物能名者。亦足慰也。

跋鮮于樞書佛遺教墨迹

釋氏書最古者。有漢時所譯佛說四十二章。後頗增改。其文不類。次則佛遺教帖。傳爲王右軍書。集古錄以爲唐人。然文義古質。得儒書精義。遠出金剛楞嚴諸佛書上。蓋譯時在魏晉前也。遺教以不畜積。不安置田宅。及戒顯異感衆。而進之以有媿恥。求精遠。修智惠。皆異乎後世之爲禪學者。釋氏戒貪。嗔。癡。人有財而求其布施。非貪乎。金剛努目。地獄變相。非嗔乎。人十月而生。不能滿百。妄冀成佛。生天。非癡乎。唐以來。僧衆談空。其流愈失。與遺教之旨大違異。且遺教爲釋迦臨終口授之詞。予遊關中。至盤屋。蓋有老聃墓云。鮮于樞以延祐六年書此。用中錄無側媚之筆。天趣秀潤。得晉代風格。昔見趙文敏寫佛說四十二章於中州。又獲觀此帖於家。鳳卿茂才處。歲事匆匆。惜不及手摹一本。因屬吳生毓汾影寫。列入子部道家書目。以備校勘云。嘉慶五年人日書。

楊光先傳

楊光先。字長公。徽州府歙縣人。明時爲新安所千戶。崇禎十年。劾大學士溫體仁。給事中陳啓新。昇棺自隨。廷杖。謫戍遼西。國朝順治三年。光先上言。時憲書面。不宜用依西洋新法五字。久之。又告湯若望誤以順治十八年閏十月爲閏七月。附呈摘謬十論。及闢邪三論。先是西洋人有利瑪竇者。與其徒湯若望等。自明萬歷時。奉所爲天主教以來。中夏其所事之象曰耶穌。手持圓象曰天。設爲天堂地獄之說。以誑誘

人謂耶穌生于漢哀帝天壽二年庚申歲。以罪磔死。其時有日食地震之異。光先斥之。比于漢之黃巾。明之白蓮教。謂耶穌死爲謀逆。不應行教于中國。且其死既言在建武八年壬辰歲三月二十二日。考漢史是時無日食地震之異。皆妄言惑衆之甚者。康熙三年七月。光先又以天主教所授江廣圖書金牌繡袋等呈控禮部。勅下吏禮二部會鞠。是年十二月戊午朔日食。湯若望推初虧在申初一刻。強食甚在申初二刻半。復圓在酉初三刻。食虧在南。光先推初虧在未正三刻。食甚在申正一刻。食虧在北。與若望異。候之如光先言。若望竟不驗。由是罷黜若望等。四年。授光先欽天監右監副。旋授監正。光先叩關辭職。疏五上不許。自輯前後所撰書狀論疏爲上下卷。名不得已錄。傳聞西洋人以重價購燬之云。其斥地圓之說。謂其遠方圓動靜之義。若浮于虛空。則人物不成安立。若有安著。則下土爲地覆壓矣。其斥星圖移宮之謬。以爲若望移寅宮之箕三度入丑宮之初。因將恆星俱移十餘度。他宮猶不爲顯。獨未鬼宿移入午宮四五度。又斥其一月三節氣。及二至二分長短。及更換鶩參二宿之謬。皆以爲不合古法。西洋人既聞光先之說。後又遁其辭以言天云。

舊史氏曰。孝經云。非先王之法言不敢言。莊子云。六合之外。聖人存而不論。論語云。蓋有不知而作。我無是。又云。君子于其所不知。蓋闕如也。西法誤會大戴禮四角不揜之言。而創地圓之說。誤會諸子九天及楚詞圓則九重之言。而創宗動天之說。誤會歲差之言。而疑恆星有古今之差。變古日月徑千里月來食日之言。而云日體大于地。地影蔽日。故日食。又以私意移北辰東移。使其國土漸入離方。皆非先王之法

言。聖人所不論。實則推步日月五星之法。不繫于此。必欲談天窮所不可知。寧信各緯書及張衡、虞喜諸人有本之言矣。光先之折西法未申。日食虧南之謬。徒以推步知之。按五經異義。月高則其食虧于上月。上則其食虧于下。是時日食在下。舖合之經義。自應虧在北也。光先文不甚雅馴。而審諤之節。有可取。孟子云。能言拒楊墨者。聖人之徒。西人以此敘述光先之功。固亦偉哉。

武億傳

武億。字虛谷。河南偃師人。先世居山東聊城縣。勝國時。有遠祖名恂者。以指揮使駐懷慶。遂爲河南人。曾祖維翰。國朝順治間。遷偃師。祖朝龍。有隱德。載在方志。俱贈奉政大夫。吏部驗封司員外郎。父紹周。雍正癸卯科進士。由安徽東流縣知縣。行取主事。官至吏部驗封司郎中。監督倉場。有政績。嫡兄三人。修、俊、伸。同母兄一人。倬。弟一人。儒。億生於京邸。少有異表。不苟嬉戲。八九歲。以朱墨點定明代名人制義。第其高下。父驚愛之。年十二。徧覽九經諸子。爲文。下筆千言。年十七至十九。連遭父及母孟氏。生母郭氏喪。哀毀骨立。鄉里感歎。億父故清宦。官中外卅餘年。家無儻石儲。值伊洛暴溢。宅舍盡圯。億就高架木爲小屋。讀書其中。嚴冬衣敗絮。或遇大風雪。持斧出取薪燃火。手僵斧落。傷足血沒踝。忍痛歸。誦書益力。服闋。應縣試第一。入學爲附生。乾隆庚寅科。中式本省鄉試第六名。舉人。三應禮部試。皆報罷。因遊朱學士筠之門。時學士負海內文望。門下士多一時賢俊。闊達不羈之才。億盡與交遊。而獨以文章氣誼相助。厲學士雅重之。爲延譽。然性樸直。不喜干謁。惟布衣履躡。就日下書肆購異書。所得金石古文。皆爲攷證。學日益進。

庚子科成進士五十六年。謁選授山東博山縣知縣。縣多山土瘠。民不務農業。地產石炭石礬。燒作琉璃器皿。供億繁多。商賈輻湊。奸宄所在匿迹。億下車。思所以變易風俗。然後以經術飾吏治。因校士發策。問邑中最敗風俗者。附郭佛寺多女尼。常街服作佛事。遊閭闔。聚觀者。猥雜生事。億汰存其老病廢疾者。餘悉遣嫁之。歲時出講鄉約。至遠僻村落。因加諭教。訟事無大小。至則判決之。或呼冤不及具詞狀。召兩造折以片言。無不得其情而去。胥吏無所施其弊。縣僻無驛傳。有急事。假里馬以供役。轉相科斂。豪者利其事。億禁革之。前官有以石炭饋上官者。浸以成俗。億察民運載山徑中大不便。手疏其患苦。請除之。捐貲議立書院於城東范文正祠傍。邑人感激輸將。閱兩月。工竣。命曰范泉書院。親臨講課。口授指畫。示以訓詁文字。通經術。樹風節之要。士皆勤奮。檄治鄰邑煤窑獄。審戶介典史某以白金二千進。典史憚億威望不敢言。億廉知之。因禱雨謂典史。吾購於神。雖貧不爲墨吏也。雷霆實聞之。時方震雷。典史驚悚。遂獲澍雨。先是縣營弁某有不法。卒張保會爲弁奪娼爲妾。億因他事治之急。弁屬上官某爲緩頰。不聽。自是拂上官意。會有步軍統領衙門番役頭目曹君錫。杜成德者。倚朝貴勢。出都探事。招從惡少十餘人。縱飲博橫於縣中。億擒至堂下。稱奉要人令。不服罪。按法笞辱之。時秉政者勢張甚。外臺多承望風旨。上官某聞之。以爲禍至無日矣。乃厚贈番役行。而假名濫刑平民。勅億罷職。億官博山纔七閱月耳。縣民聞億受代。則扶老攜幼。率千餘人赴省乞留。大吏某故賢者。勅億時。特爲守所持。及見民情。大感動。因入覲。約與偕行。爲籌捐復。時故大學士公阿文成公見大吏於朝。謂之曰。例禁番役出京畿。奈何責縣令按法之非。

且隱其實而勦強項吏何也。大吏深自悔。然卒格於部議歸。博山民猶謂當復任。老弱遠迎界外。告之故。人人哭失聲。已而相與館。故令家於縣中。朝夕饋問。億愈不忍以家口累民。乃遣歸其鄉。而自閒遊東昌。臨濟。開藉書院以餬口。至河南。詣好士友人。與修縣志。以終其身。嘉慶四年十月卒於鄧州客館。得年五十有五。是冬有旨命朝臣密保內外員操守端潔才猷兼濟。及平日居官事蹟可據者。赴部候旨召用。億名在保薦中。縣令捧檄至門。亡已一月矣。億至性淳篤。生平重風義。嘗由都奉兄倬柩南歸。乏資斧。手輓鹿車。不避溽暑泥濘。比達里門。足重贖。既葬。爲之立後。族孫有孤貧者。十五年與同蠶。聞師喪。千里奔赴嵩縣。典史某卒。喪不能歸。解衣質錢資之行。設義田縣北郊。收僱師之棄殤者。冀以厚風俗。在魯山時。楚匪擾至河南唐鄧之境。億爲令區畫。議復魯陽關。設兵防交口鎮。以扼荆襄要路。立保甲。西山諸邨塢。防逸賊竄匿。未及行而交口鎮。西山俱被賊焚掠無餘。鄧州既經蹂躪。士民禦賊死事者。未得申上其實。億勸立國殤祠。以厲鄉勇。其以維持風教爲己任類此。億通貫經籍。講學依據漢儒師授。不蹈宋明人空虛臆說之習。所著經義。原本三代古書。疏通賈孔疑滯。凡數百事。所得列代金石爲古人未見者數十通。因之攷正史傳者又數十事。今中州人知讀古書。崇經學。搜訪碑刻。備一方掌故。多自億爲倡始云。撰羣經義證。經讀攷異。三禮義證。讀史金石集目。授堂金石跋。錢譜詩文集。札記之屬數百卷。與修魯山。郟。寶豐。安陽四縣志行於世。子三人。穆淳。景淳。盛淳。孫未。

舊史氏曰。武君真循吏也。在官七月。而得民心如是。令久於其任。治行當不止此。爲縣令者人人如億。吏

治之弊。不至不可移易。墨吏負幣愈多。去之愈有所牽掣。強項吏一出而被劾。且以沽名相詬嫉。不遇非常察舉之詔。何以厲廉節耶。予與武君交最密。知其事始末甚悉。及予罷山東廉使任。爲阿附朝貴者所媒孽。事大類武君。獨爲君子。求治太急。固俗所忌耶。抑遇非其時也。直諫多聞之交。又弱一个。悲已。

汪中傳

汪中。字容甫。江南江都人。少孤貧。力不能就傅。因罵書詣人家學舍中。稍稍識字。通文義。穎慧絕人。嘗代學僮爲文。欺其師。塾師大驚異。久之。遊書肆。與書賈交。借閱經史百家。博究古籍。能別白是非真僞。入學爲附生。學使者至。則先耳中狂名。欲因試擢辱之。及見其文。皆甚推服。試上。等中侃侃辯益。廷無所屈。朱學士筠督學安徽。中往就之。時太平守沈業富亦客中。交道漸廣。中嘗對策場屋。問事者屢至。悉疏示之。出場後。因撰策學數十篇。不檢書。不屬稿。刊行於時。大爲翹祭者所祕寶。覆按書無舛誤者。翁閣學方綱。朱侍郎珪先後校士江左。思暗中物色之。中不就試。乾隆丁酉歲。謝侍郎墉來督學。選拔貢生。中不應。朝考亦不就試。益以經義自娛。當是時。四庫館開。海內異人異書竝出。經學小學算學詞章金石之學。卓然以撰述自見者。有錢少詹大昕。王光祿鳴盛。盧學士文弼。孫侍御志祖。王兵部念孫。段大令玉裁。戴編修震。王副憲昶。蔣編修士銓。袁大令枚。姚比部鼐。中於諸君爲後進。皆辯難無所讓。別自書當代名人姓字。品數高下。人愈嫉之。以爲汪中善罵人。中曰。吾鄉多買人。不知學短長。日見諛者衆。遣罵乃疑爲俊士。且吾不罵庸俗人也。得吾罵亦大難。或言遭罵妄傳耳。然中能鑒別彝器書畫。得之售數千百倍。家漸豐裕。

中深自斂抑。爲詩曰：伴狂罵坐自平日。焉知性命鴻毛輕。寓書規子曰：學問觀其會通。性行歸於平實。蓋中之學益進於道。遊楚謁畢督部。歸愛浙西山水。留久之。乾隆五十九年。月以疾卒於西湖葛嶺園客會中。解經有神識。病古人之疑周官。左傳也。爲周官徵文。及左氏春秋釋疑。皆依據經證。箴砭俗學。又病後人疑經中春會男女之文。中讀會若司會。以謂霜降逆女。冰泮殺止。至中春則過時。媒氏書男女年月日名。於是時計之。予亦言。聘則爲妻。奔則爲妾。經言奔者。謂不及禮聘。非淫奔也。又病未嫁女爲壻守貞之不合禮。以謂婦人不二斬。故爲夫斬則爲父母期。未有夫婦之恩。而重爲之服。以降其父母。於壻爲無。因於父母爲不孝。失禮之中。又失禮焉。凡所爲文。皆有益經術。維持世道。餘見所著述學云。中於詩古文。書翰無所不工。振筆千言。不加點竄。盡如人意所欲出。愛春秋左氏學之。自言取法乎上。不失爲漢魏文也。生平不習宋人理學。及世俗非鬼之祭。斤斤焉斥胥西域金人一切淫祀之屬。妻有過。出之。俗人頗以爲怪。而中孝事寡母。篤於交誼。所至之處。訪故師友。墓拜奠之。或卹其後人。死後。妻妾皆守節撫孤子。不墜家教。

舊史氏曰：汪中非狂士也。方中困厄時。俗人擲揄之。因愈激烈罵坐。然中文原本經術。皆先王之法言。比之昔人疑繫詞。書序。改易詩序。議周官禮記。刪孝經。絕不知畏聖言者。其狂何如哉。中與子學術最相契合。惟論明堂石鼓意見不同耳。其長不可及也。中卒得自贖其生。有子息。不至如明唐寅。徐渭之放廢。亦學足以自立。世人以不狂爲任。豈不惑哉。



章宗源傳

章宗源字逢之。浙江山陰人。以兄編修宗灝官京師。遂以大興籍中式乾隆丙午科舉人。少聰穎。不喜爲時文。以對策博瞻發科。益好學。積十餘年。采獲經史羣籍傳注。輯錄唐宋已來亡佚古書盈數笈。自言欲撰隋書經籍志攷證。書成後。此皆糟粕可芻之。然編次成帙。悉枕中秘本也。又言輯書雖不由性靈。而學問日以進。吾爲此事久之。亦能爲古文爲駢體文矣。又以今世所存古書版本多經宋明人刪改。嘗恨曩時輯錄已佚之書。不錄見存諸書。訂正異同文字。當補成之。其已輯各書。編次成帙。皆爲之敘。通知作者體例曲折。詞旨明暢。古書多亡於北宋。故輯書始於王應麟。近代惠徵君棟題爲之。四庫全書用其法。多從永樂大典寫錄。編次刊布甚夥。至於宗源。則無書不具焉。時都門廣慧寺有妖僧明心者。誑人以符錄降鬼僊。挾而書几言禍福。又賄客僕從。刺探隱事。面發之示神驗。京朝官之佞佛者。大爲扇惑。爭饋貽之。僧益豪橫。或占人墳塋作廟基。或權子母取重利。事敗。僧以罪遣歸南中。宗源等以佛事與牽連。罷斥。不能復與會試。僧又潛出遊齊魯間。就大吏之不潔者。網賄遺。易姓名。捐職丞倅。出入詭秘甚。而宗源等猶信之。持長齋。且寓書屬予去所爲三教論者。予著三教論時。京朝官惑於妖僧日甚。因以曉譬之。大吏某曾倚上官勢。屬予去其文不得。及得宗源書。戲云。君以生平輯錄書付我。我即去此文。君必祕愛不忍割。是色空之說。不足恃也。然宗源好學之志終不衰。性恬澹。不冝干謁。亦異乎世之所謂禪鑽者。以嘉慶五年□月□□日疾卒於京邸。撰隋書經籍志及雜文若干卷。

舊史氏曰。惜哉章君之好學而惑於釋氏也。既輯錄三代先秦古書。豈不知佛書出東漢。六朝之不足貴。并非西域浮屠之所乘筆耶。及爲妖僧誑誤。猶以素食終身。年未五十而溘逝。釋氏之効安在。或言章君死時。神清明無所苦。此何益。且反常也。孔子大聖。寢疾七日。曾子大賢。反簀未安。徂歿之痛。達人不諱。儒者身備四氣。哀樂反常。豈發皆中節之學乎。傳曰。未知生。焉知死。又曰。大哉死乎。君子息焉。小人休焉。儒通天人。勿可尙已。

## 台州府松門山天后宮龍王堂碑記

海之祀見於經證者。惟詩周頌般序有祀四岳河海之文。禮樂記云。三王之祭川也。先河而後海。漢武詔以河海潤千里。令祠官修祠爲歲事。南北朝以來。有蓬萊海若之祀。隋始近海立祠。唐始封王。東海曰廣利。宋加淵聖廣德。助順廣德之號。祠於明州定海。詔爲大祀。而天妃之祀見於正史。則始於元至元。南海女神靈惠夫人以護海運有奇應。加號積至十字十二字。廟曰靈應。他書以爲始自宋。又舉人神以實之。皆不見於正史。前明崇禎時。復封碧霞元君。國朝屢以靈應加封。尊爲天后。今上嘉慶四年。增封護國庇民妙應昭靈昭應宏行普濟福佑羣生誠感咸孚顯神贊順垂慈篤佑天后。台州府松門山天后宮龍王堂舊廟所在也。嘉慶五年。太歲庚申。爲今撫部阮公莅浙之明年。稔海盜之鴟張日久。將加大創。預絕其齋糧偵伺之路。先事蹟製大戰艇。又奏請閩粵舟師會剿。得旨。則嚴守禦。設方略。購獲盜詞數十人。盜大窮蹙。六月十二日。合師海風大作。一夕漂沒盜船數百。殲戮沈溺無算。設伏島嶼。擒獲其竄匿者又數百。

人海疆之民。鼓譟相慶曰。此撫部之力。撫部曰。此天子之德。天子曰。繫神之功。乃僉撫部所請。發藏香。齋神廟。御書扁額。賈懸於天后宮龍王堂。以荅神休。經曰。天明威。自我民明威。傳曰。陽威天不旋日。諸侯不旋時。大夫不過期。惟撫部知民疾苦。爲之遣海舶。請舟師。故師未至而盜氣懾。惟天子能用儒臣。伸國威。奮智勇。故士氣倍而神靈格。惟天鑒聖君賢臣一德一心。與民噢咻。故不費折衝。不煩轉餉。俾海隅有按堵之日。不然。神廟之建數百年。海盜之患非一日。海風波濤亦時作。而必乘國家赫怒整旅之日。効靈受賜於宣室。是則神之靈。皆天子之德。中丞之力。民之所不能忘。不可不紀也。若夫水爲土妃。又在坎位。女宿所居。象飾似之。有舉莫廢。亦祀典也。星衍母服未除。授經此土。撫部阮公以親見其事。屬爲文以紀神靈錫予之盛。不敢以卑位辭。銘曰。

皇皇地祇。執主宰是。居陰配天。有元肇祀。朝宗於東。爲百谷王。翼翼神廟。溯自隋唐。神光之祐。管寧以濟。越在我朝。反風示異。松門巖巖。海若所依。潢池出沒。神怒睨之。天子命我。旣旣大府。靖此海隅。有文有武。聲威大張。詞伺以窮。取其鯨鯢。覆其螻蟻。屏翳乘之。亦有胥種。神之格思。仁者有勇。殲厥渠魁。福我蒸黎。海波不揚。明臺受釐。天章昭回。輝炳神宇。滄桑既閱。祀典有舉。毋弛民務。毋齋盜糧。遠臣監司。敢告封疆。

清故河南山東河道總督提督軍務資政大夫兼都察院右副都御史司馬公駒墓志銘

公姓司馬。諱駒。字雲臬。號溶川。江寧府江寧縣人。其先得姓受氏。詳於太史公書。南宋播遷。失其世數。高祖燧居浙江寧波。祖裕始遷江寧。入學爲弟子員。父必售。妣方氏。自公高祖以下。皆封贈如公官。兄驥。弟

賥俱先卒。公生而穎異，讀書目數行下，稍長，留心經世之學，講貫河防水利農政諸書，於文章尤喜陸宣公奏議。故大學士高文恪公晉節鎮江左，延八幕府，紳奏牘疏密大小，咸得其宜，甚相倚重。文恪以公明習河務，奏請以從九品留工効用。乾隆二十九年，奉旨分發南河，以勞歷山陽縣主簿，興化縣縣丞，通州州判，海州州同，高堰通判，山安同知，公外領地方，內參幕務。高文恪連季奉命塞河徐豫，無役不從，皆能規度指畫，數陳曲當。凡所入告，悉蒙俞旨。故兩江總督薩載公知名，亦傾心延接。五十年，奏擢江南河庫道，道庫每歲出入白金六十萬兩，河防歲修有成數，溢額則俟上聞，河丞值險工，借發帑金，執政者不爲依期入告，率皆移易處所，通融彙報，久則因緣爲弊，帑藏空虛，公不激不隨，從容籌補，公私具舉。上下安之，不問家人生產作業，意泊如也。五十一年，南河漫口，奉檄督工，先事撫卹，拊渡災民，全活甚衆。五十四年，周家樓塞口告成，有旨議敘，公遇水旱，先期斟酌蓄洩，沿河田畝，盡沾利澤，又濬清江文渠溝水，贊助公車。士庶咸頌。五十五年，擢授江西按察使，臬司核讞一方刑獄，不習律令者，高下緩急，一委幕僚胥吏，其能者，又持屬吏短長，網賂遺，或徇守令屬託執法，公正已奉公，深悉弊竇，爰書覈核，從無假手。在官七年，屬城悅服。時值江右大吏以簠簋不飭被劾，連牽獲咎者衆，公竟以謹慎免患。世論歸之。嘉慶元年，擢山西布政使，未幾，調任山東，特命兼理河務。其年，黃河下游壅溢，水與隄平，碣汛曹工，先後漫溢，公偕故兩江總督李公奉翰、南河總督康公基田、前山東巡撫伊江阿公奉命堵塞，旋擢河南山東河道總督，公新以藩司擢任，驟難專制，俛仰諸大僚，閒見其意見不同，將致愆事，深自斂抑，謹畏。如在江右時，旣而

曹工逾年堵合不成。奏請停工。奉旨革職留任。朝使臨工按視。公分謗焉。是時夫人張氏卒於使署。內不顧私。賻贈不納。其刻厲類此。三年冬。堵築豫省。雖工漫口。公五閱月。行風雪中。寢食俱廢。豫撫廉慎。和衷共濟。工具踴躍。一舉成功。奏報堵合。奉旨賞復頂戴。並免代賠銀六萬兩。公念起家孤寒。以筆札遇知己。致通顯。每膺殊擢。受異數。感激涕零。有盡命王事之志。既以曹豫宜防積勞體羸。適聞純皇帝龍馭上賓。遺詔將至。北向長號。咯血不止。延醫診視。俱云心脈已枯。藥力不及。口授遺摺。望闕謝恩。遂以二月二十三日卒於曹單工次。春秋七十有一。上聞。軫惜久之。降旨議卹。禮也。公處肩火色。目精洞照。英偉軼倫。平生勤學好問。嫻於掌故。遠近書疏。悉皆手答。丁事款密。莫不感懷。徵時所荷。一餐咸報。高文恪歸櫬。經紀其喪。後至都門。躬自展墓。與人交。有本末。周卹無倦。篤於內行。兄弟從子。無閒言。時以爲史稱通而不泰。清而不介。惟公有之矣。妻張氏。封一品夫人。子賈。副榜貢生。召試舉人。內閣中書。好古有文。早卒。孫淳。蔭生候選員外郎。星衍始官京師。與公子賈爲文字交。及官山左。與公同僚。共治河之役。後又備員節下。親見公行事。藏公手牘數十紙。皆綱繆公事。尋繹難忘。今淳以某年月日。將葬公及夫人於江寧某鄉之原。以狀走乞志墓。蓋不忍以不文辭。銘曰。

公爲政績可紀。公塞河以勤死。觥觥筆札。況才美。揚於王庭。傳信史。家聲清白。施孫子。我僑茲郡。銘其里。文無溢詞。庶不媿。

清故山東兗州府運河同知知府銜前署山東運河兵備道龔君士燧墓志銘

君姓龔氏諱士燿字德煊號燮堂先世有漢勃海太守遂家山陽其族甚盛唐宋多達官或居閩之興化莆田皆有世數可紀明天啓開移家於吳子禹臣爲君祖以孝行聞子某爲君父鄉里稱其潛德妻顧氏側室劉氏曹氏自君祖以下皆以君官累贈朝議大夫祖妣及妣生妣皆贈恭人曹恭人實生君及第三人曰朝鼎曰寶鼎曰紹箕俱得官丞倅君生而穎慧幼遭嫡母喪哀毀如成人禮既就傅勤學能文屢應童子試冠羣君念祖父俱以尚義好施家道中落非負米出遊無以爲養以是棄科舉業遊幕淮揚開在河丞署聞父凶耗奔喪歸自傷不及視含歛毀瘠尤甚時君年未三十諸弟少姊妹四人未嫁食指數百君綢繆家計率以勤儉妻顧氏黽勉同心紡績爲助始無內顧憂遊道日廣漸復先業諸弟前後成家諸妹亦遣嫁焉君既熟悉河務淮揚觀察爭聘延之值有河溢之事擘畫工役撫卹吳黎頌聲載道河督吳公嗣爵總督薩載公大學士總督高文端公晉臨視河壩聞君名咸相引重故淮揚所屬河防諸務皆秩然有章大學士公阿文成公視河豫省奏留君河工効力以勞送部引見乾隆四十八年署山陽縣主簿擢東平州州判歷東平州州同擢沂州府沂邳海贛通判署曹州府曹單同知調兗州府捕河通判五十五年擢兗州府泃河同知遇恩及敍勞加二級歷年防汛催漕敍功紀錄二十七次五十六七年河南山東河道總督李公奉翰連奏君護理運河兵備道隨河督在臨清督催糧艘適聞生母疾心動乞假母已奄逝扶榭歸葬哀榮俱盡親族稱之君妻顧亦以是時棄世君以微時共甘苦遂無再娶之志服闋候補東河時南河豐汛漫溢君隨河督李公奉翰到工襄事嘉慶二年堵築工成今南河總督康公基田前爲

山東布政使奉命治河。會同河督奏君在工勞績。奉旨加知府銜。九月。隨河督赴楚防守漢江。又以勞績奏請賞戴花翎。皆異數也。三年。補兗州府運河同知。故河督司馬公駒。今河督吳公璣。皆器重君。咨諏河務。多裨益焉。君筮仕十餘年。俱在上府參理公事。大工一切章奏。出君手。信任日專。未嘗出賣寒熱。接見僚吏。謹畏如不自容。河防陳奏。機宜依於舊章。質直條達。不肯爲虛誣。徇時好高下其手。曹工再報合龍。君時引疾退居。未爲屬稿。其慎密類此。居家痛親不逮養。自奉儉素。昆弟同居。易衣并食。無分厚薄。諸弟或爲君製新裘。易其舊者。君知則止之曰。晏子一裘三十年。而齊國之士待而舉火。吾寧儉自奉。而周人急也。親族有貧乏者。代爲昏嫁營葬。少工詩文。與黃司馬易。顧進士禮琥。多授簡酬唱之什。輯錄成帙。藏於家。四年八月望日。以疾卒於官署。春秋六十。將以某月某日葬於某鄉之原。禮也。子慶祥。投効河工。從九品。女四人。不佞官山東監司時。親見君行事。嘉君內行。以弟之子妻君。從子慶長。今君諸弟寓書赴告。并乞志墓。既雅知君。又有肺附之誼。蓋不敢辭。銘曰。

參軍記室古辟舉。君才經世佐公府。負薪塞河始丞簿。賢勞升聞易簪組。恂恂家法化轅蓋。施於有政不出戶。我陳生駕到吳土。大書瓦屑封若斧。

清故封修職郎兩浙鹽課大使陶君正祥墓碣銘

封修職郎兩浙鹽課大使陶君。名正祥。字庭學。號瑞菴。祖父某。自浙之烏程縣移家吳門。第三子某生君。少聰慧。就傳讀書。與同學生以默識角勝負。塾師異之。家貧。無以爲養。遂以債書爲業。與吳中名下士交接。

聞見日廣。久之。於書能知何書爲宋。元佳本。有誰氏刊本。版貯何所。誰氏本善。且備。誰氏本刪除本文。若注或舛誤。不可從。都中鉅公宿學。欲購異書者。皆詣君。車轍滿戶外。會開四庫全書館。安徽提學朱君筠。言於當道。屬以搜訪祕書。能稱事焉。子珠琳。由內廷三館供事。敍用得兩浙錢清場鹽課大使。地贈君如其官。君在官署逾年。教子廉儉。旋屬引退。曰。汝多疾而素餐。不如歸。償書也。君旣家吳門。僑寓都下。賢士夫往來輻湊。廣求故家書籍。祕本。歷數十年。嘗嘉陳思之爲寶刻。叢編也。語予云。恨不爲一書。記所過目。宋。元。明。刊。刻。經。傳。諸。子。各。本。卷。帙。文。字。異。同。優。劣。補。書。目。家。未。備。惜。今。晚。矣。與。人。買。易。書。不。沾。沾。計。利。所。得。書。若。值。百。金。者。自。以。十。金。得。之。止。售。十。餘。金。自。得。之。若。十。金。者。售。亦。取。餘。其。存。之。久。者。則。多。取。餘。曰。吾。求。贏。餘。以。糊。口。耳。己。好。利。亦。使。購。書。者。獲。其。利。人。之。欲。利。誰。不。如。我。我。專。利。而。物。滯。不。行。猶。爲。失。利。也。以。是。售。書。甚。獲。利。朝。之。公。卿。四。方。好。學。之。士。無。不。知。有。五。柳。居。主。人。者。當。是。時。都。門。售。書。畫。有。王。某。售。舊。瓷。什。器。有。顧。某。意。見。悉。如。君。皆。盛行。於。時。老。子。言。欲。取。必。與。左。邱。明。言。以。欲。從。人。其。道。然。也。王。某。顧。某。死。其。子。執。所。得。物。價。貴。賤。物。多。壅。積。焉。故。君。子。珠。琳。獨。能。承。父。業。與。當。代。士。夫。交。不。復。出。奉。撤。矣。君。季。高。坐。市。肆。傲。倪。俗。人。來。售。書。者。問。欲。得。何。書。言。不。當。則。令。他。人。應。接。曰。是。欲。爲。科。舉。業。若。新。入。詞。館。欲。得。學。堂。書。耳。性。任。俠。曾。經。高。淳。湖。起。蛟。舟。覆。君。探。窗。出。奮。力。拚。溺。者。周。卹。之。友。張。某。者。嘗。以。白。金。四。十。兩。寄。君。處。權。子。母。暴。死。無。家。屬。君。訪。其。中。表。債。之。使。買。地。營。葬。與。弟。甚。友。愛。弟。死。撫。其。兩。子。畢。昏。嫁。猶。誠。之。以。市。道。壞。人。心。術。也。君。以。嘉。慶。二。年。八。月。二。日。卒。於。都。門。春。秋。六。十。有。六。妻。周。氏。贈。孺。人。子。珠。琳。兩。浙。錢。清。場。鹽。課。



大使。女一人。孫以仁。予官都門。退食遊書肆。與君日相見。君見予藏孫子魏武注。以爲世無此本。刊入漢魏叢書中。又以予言。刊葛氏永懷堂十三經注及抱朴子。太元經之屬。以行世。版存於家。今君子以予僑居金陵。寄至元金陵志爲潤筆。屬作君墓碣。予念世之稱事者少。雖書賈無復如君之知書也。爲文且銘曰。

不知書。何足數。斗筲人。媿書賈。教子歸來似其祖。不求甚解能著古。我銘其墓不爲諛。兼金可卻書可取。清故文林郎河南虞城縣知縣施君韓墓碣銘

君姓施氏。名韓。字佩衡。號棣莊。常州府陽湖縣人。明時有名灑者。自無錫遷居常州之安定東鄉。爲君十四世祖。贈文林郎名維賢者。爲君祖父。贈文林郎名普者。爲君父。皆能勤學好施。君生而穎異。讀書過目不忘。少有至性。九歲遭母疾。侍奉不倦。如成人。及喪。哀毀至咯血。十三歲喪父。亦如之。既長。屢困童子試。遂遊京師。備書自給。貧不能具裘葛。愈積學。能楷書。爲古文辭。旋以國子監生應順天鄉試。中式。乾隆三十六年。舉人。四十六年。挑發河南。以知縣用上。官知君能。卽檄折疑獄。稱平。時值河南青龍岡河溢。君從泥濘中。率丁役。負藉土。治道以通車運。晝夜不寢息者廿日。河隄使者倚重君。凡工次采買。藉絲及疏浚引河。皆任其役。積藉倍常數。濬工先期告竣。朝使故大學士公阿文成。公按視河壩。以合龍潰事。奏請遴選能吏。重浚新河。限廿日竣事。君獨以未補令與焉。工竣。敍功一等。四十八年。補授虞城縣知縣。沿河令歲率駐工防汛。歲修隄堰。君外督修防。兼理獄訟。從容措置。悉舉其職。虞城。商邱之間。舊有沙河。達洪澤。

湖方開引河時。議塞沙河下游。使河勢由夏邑南趨近隄。居民運載失便。君寢其議。河流亦遵道下注。前後以勞紀錄六次。河督蘭公第錫以君既深明河務。凡河丞工作。一委任焉。明年河溢。雖工水及縣境。君先期堵閉橋空。加築隄堰。民以免患。出資濟渡鄰邑災黎。多所存活。君治引河有方略。或通溝以瀦水。或留埤以輸土。故工作視他處。而省費十二三。五十年夏。柘城奸民事起。近邑戒嚴。或謂君閉城禦患。君曰。不忍棄吾城外赤子也。又謂君多張聲勢。巡羅郵保。君曰。此賊未至而擾民也。親履四境。勸民聯絡保守。歸併黃河渡口。人庶安堵。賊不敢侵。旋就勦戮。是年境中苦旱。君力請賑卹。實力奉行。竝捐奉錢。加散口糧一月。其後齊晉楚豫飛蝗。徧起。不入縣境。民以爲德政之感。以五十二年正月卒於官署。春秋五十有一。嗚呼。世之所爲能吏者。以治供張探迎上官意。或陰以饋遺進。求其知刀筆筐篋。簿書期會。及史稱辭吏。古所譏催科吏。且不可得。若君之盡職勤民。遇變而不亂者。蓋尅親矣。君妻莊氏。先卒。繼娶錢氏。俱贈孺人。子應飛。捐職同知。不佞既與君同里。及遊畢。撫部幕府時。知君治行。後官山左。邀君子佐浚河之役。益知其能承家教。以狀乞文。蓋不敢辭。銘曰。

吏道弛兮爲國盡。先攀援兮後民務。吁嗟施君來何暮。河渠奠兮獄訟平。螟不入境兮柝不驚。吁嗟施君兮不可死。復生。